



Gion Battesta Beer

24-6-1922 - 19-4-2012

Gion Battesta Beer ei naschius ils 24 de zercladur 1922 so'emprem feagl de Gion Antoni Beer ed Onna Maria nata Gieriet.

Sia affonza ha el passentau ensemen cun aunc treis frars ed ina sora. Sco'emprem e taffer buob ha ei giu num de segidar da pign ensi en il menaschi puril dils geniturs.

Carschius si ha el stuiu fadigiar il paun da mintgadi sco fumeagl ni pastur en il puresser de gliez temps.

Suenter la tresta mort da dus frars e dalla cara mumma eis el restaus persuls en casa cun il bab. El ha empriu de cuschinar e far il percasa. Dasperas ha el luvrau tier differents impressaris, demai ch'il puresser era vegnius liquidaus.

Suenter la mort dil bab ha el sez vului luvrar siu prau e far il pur da nuorsas. Sias caras tschuttas ha el clamau per il num e giu grond plascher dad ellas. Siu pli grond plascher era denton il viagiar. Sin biars viadis organisai ha el viu in bien ton dil mund. Ses viadis han menau el beinsavens a Lourdes, auters en biaras tiaras dalunsch e damaneivel. Sin ses viadis, ha el viu la pupira che reveva en biars loghens. Mintgamai turnaus a casa ha el perquei giu cor e maun aviert, specialmein per ils paupers affons bandunai, dallas vias.

Biars onns ha el priu part dil chor mischedau dil vitg. El ha cantau cun anim ed ha priu part stediamein allas improvas. Cu il chor ha acquistau ina nova bandiera, ha el giu l'honor de far padrin da tala.

Vegnent ils onns de vegliadetgna e fleivlezia, ha el priu dimora en la casa da vegls s. Vigeli. Leu ha el passentau aunc biars onns, nua ch'el ei vegnius tgiraus cun beinvulientscha e quitau. Siu esser ei ils davos onns vegnius stgirentaus d'ina maligna malsogna, ch'el ha supportau pazientamein. Ussa ha el fatg il davos viadi.

Ses nevs e niazas seregordan oz d'haver entupau da pign ensi Gion Battesta cun ina fatscha rienta, cuntenta. Els sco nus tuts vegnin a tener el en cara memoria.

El ruaussi en paisch!